



岑嘉州集序



自古文體變易多矣梁簡文帝及庾肩吾之屬始為輕浮綺靡之詞名曰宮體自後沿襲務於妖艷謂之摘錦布繡焉其有敦尚風格頗存規正者不復為當時所重諷諫比興由是廢缺物極則變理之常也聖唐受命斷雕為撲開元之際王綱復舉淺薄之風茲焉漸革其時作者凡十數輩頗能以雅參麗以古雜今彬彬然燦燦然近建安之遺範矣南陽

岑公聲稱老著公諱參代為本州冠族曾太
公文本大父長倩伯父義皆以學術德望官
至台輔早歲孤貧能自砥礪徧覽史籍尤工
綴文屬辭尚清容意尚切其有所得多入佳
境迥拔孤秀出於常情每一篇絕筆則人人
傳寫雖閭里士庶戎夷蠻貊莫不諷誦吟習
焉時議擬公於吳均何遜亦可謂精當矣天
寶三載進士高第解褐右內率府兵曹參軍
轉右威衛錄事參軍又遷大理評事兼監察

御史充安西節度判官入為右補闕頻上封
章指述權佞改為起居郎尋出號州長史又
改太子中允兼殿中侍御史充關西節度判
官聖上潛龍藩邸揔戎陝服參佐僚史皆一
時之選由是委公以書奏之任入為祠部考
功二員外郎轉虞部庫部二正郎又出為嘉
州刺史副元帥相國杜公鴻漸表公職方郎
中兼侍御史列於幕府無幾使罷寓居於蜀
時西川節度因亂受職本非朝旨其部統之

內文武衣冠附會阿諛以求自結皆曰中原
多故劍外小康可以庇躬無假向闕公乃著
招蜀客歸一篇申明逆順之理折挫佞邪之
計有識者感歎姦謀者慙沮播德澤於梁益
暢皇風於邛犍旅軫有日犯軼俟時吉住凶
歸嗚呼不歲月逾邁殆三十年嗣子佐公復
纂前緒亦以文彩登名翰場有公遺文貯之
筐篋以確接通家餘烈忝同聲後輩受命編
次因令繕錄區分類聚勒成八卷儻後之詞

人有所觀覽亦由聆廣樂者識清商之韻遊
名山者仰翠微之色足以瑩徹心府發揮高
致焉京兆杜確序

岑嘉州集卷第一

五言古詩

送許子擢第歸江寧拜親因寄王大

昌齡

建業控京口金陵歎滄溟君家臨秦淮傍對
石頭城十年自勤學一鼓遊上京青春登甲
科動地聞香名解榻皆五侯結交盡群英六
月槐花飛忽思萼菜羨跨馬出國門丹陽返
柴荆楚雲引歸帆淮水浮客程到家拜親時

入門有光榮鄉人盡來賀置酒相邀迎閑眺
北顧樓醉眠湖上亭月從海門出照見茅山
青昔為帝王州今幸天下平五朝變人世千
載空江聲玄元告靈符丹洞獲其銘皇帝受
玉冊群臣羅天庭喜氣薄太陽祥光徹宵冥
奔走朝萬國崩騰集百靈王兄尚謫宦屢見
秋雲生孤城帶後湖心與湖水清一縣無諍
辭有時開道經黃鶴垂兩翅徘徊但悲鳴相
思不可見空望牛女星

武威送劉單判官赴安西行營便呈

高開府

熱海亘鐵門火山赤金方白草磨天涯胡沙
奔茫茫夫子佐戎幕其鋒利如霜中歲學兵
符不能守文章功業須及時立身有行藏男
兒感忠義萬里忘越鄉孟夏邊候遲胡國草
木長馬疾過飛鳥天窮超夕陽都護新出師
五月發軍裝甲兵二百萬錯落黃金光揚旗
拂崑崙伐鼓震蒲昌太白引官軍天威臨大

莽西望雲似蛇戎夷知喪亡渾驅大死馬繫
取樓蘭王曾到交河城風土斷人腸寒驛遠
如點邊烽牙相望赤亭多飄風鼓怒不可當
有時無人行沙石亂飄揚夜靜天蕭條鬼哭
夾道傍地上多髑髏皆是古戰場置酒高館
夕邊城月蒼蒼軍中宰肥牛堂上羅羽觴紅
淚金燭盤嬌歌艷新粧望君仰青冥短翮難
可翔蒼然西郊道握手何慨慷

送王大昌齡赴江寧

對酒寂不語悵然悲送君明時未得用白首
徒攻文澤國從一官滄波幾千里群公滿天
闕獨去過淮水舊家富春渚嘗憶卧江樓自
聞君欲行頻望南徐州窮巷獨閉門寒燈靜
深屋北風吹微雪抱被肯同宿君行到京口
正是桃花時舟中饒孤興湖上多新詩潛虬
且深蟠黃鶴飛來晚惜君青雲器努力加餐
飯

送祁樂歸河東

祁樂后來秀挺身出河東往年詣驪山獻賦
溫泉宮天子不召見揮鞭遂從戎前月還長
安囊中金已空有時忽乘輿畫出江上峯牀
頭蒼梧雲簾下天台松忽如高堂上颯颯生
清風五月火雲屯氣燒天地紅鳥且不敢飛
子行如轉蓬少華與首陽隔河勢爭雄新月
河上出清光滿關中置酒灞亭別高歌披心
胸君到故山時爲謝五老翁

北庭貽宗學士道別

萬事不可料歎君在軍中讀書破萬卷何事
來從戎曾逐李輕車西征出太蒙荷戈月窟
外探甲崑崙東兩度皆破胡朝廷輕戰功十
年祇一命萬里如飄蓬容鬢老胡塵衣裘脆
邊風忽來輪臺下相見披心曾飲酒對春草
彈碁聞夜鐘今且還龜茲臂上懸角弓平沙
向旅館匹馬隨飛鴻孤城倚大磧海氣迎邊
空四月猶自寒天山雪濛濛君有賢主將何
謂泣塗窮時來整六翮一舉凌蒼穹

送許拾遺恩歸江寧拜親

詔書下青瑣駟馬還吳洲束帛仍賜衣恩波
漲滄流微祿將及親向家非遠遊看君五斗
米不謝萬戶侯適出西掖垣如到南徐州歸
心望海日鄉夢登江樓大江盤金陵諸山橫
石頭楓樹隱茅屋橘林繫漁舟種藥疏故畦
釣魚垂舊鈎對月京口夕觀濤海門秋天子
憐諫官論事不肯休早來丹墀下高駕無淹
留

虢州郡齋南池幽興因與閻二侍御
道別

池色淨天碧水涼雨淒淒快風從東南荷葉
翻向西性本愛魚鳥未能返巖谿中歲徇微
官遂令心賞睽及茲佐山郡不異尋幽棲小
吏趨竹徑訟庭侵藥畦胡塵暗河洛二陝震
鼓鞶故人佐戎軒逸翻凌雲霓行軍在亟谷
兩度聞鶯啼相看紅旗下飲酒白日低聞君
欲朝天駟馬臨道嘶仰望浮與沉忽如雲與

泥夜眠驛樓月曉發關城鷄惆悵西郊暮鄉
書對君題

送青龍招提歸一上人遠遊吳楚別

詩

久交應真侶最歎青龍僧棄官向二年削髮
歸一乘了然瑩心身潔念樂空寂名香泛窓
戶幽整清曉夕往年杖一劔由是佐二庭於
焉久從戎兼復解論兵世人猶未知天子願
相見朝從青蓮宇暮入白虎殿宮女檠錫杖

御筵出香爐說法開藏經論邊窮陣圖忘機
厭塵喧浪迹向江海思師石可訪惠遠峯猶
在今旦飛錫去何時持鉢還湖煙冷吳門淮
月銜楚山一身如浮雲萬里過江水相思眇
天外南望無窮已

送李翥遊江外

相識應十載見君只一官家貧祿尚薄霜降
衣仍單惆悵秋草死蕭條芳歲闌且尋滄洲
路遙指吳雲端匹馬關塞遠孤舟江海寬夜

眠楚煙濕曉飯湖山寒砧淨紅鱸落袖香朱
橘團帆前見禹廟枕底聞巖灘便獲賞心趣
豈歌行路難青門須醉別少爲解征鞍

送王著作赴淮西幕府

燕子與百勞一西復一東天空信寥廓翔集
何時同知己悵難遇良朋非易逢憐君心相
親與我家又通言笑日無度書劄凡幾封湛
湛萬頃陂森森千丈松不知有機巧無事干
心胸滿堂皆酒徒豈復羨王公早年抱將略

累歲依幕中昨者從淮西歸來奏邊功乘恩
長樂殿醉出明光宮逆旅悲寒蟬客夢驚飛
鴻發家見春草却去聞秋風月色冷楚城淮
光透霜空各自務功業當須激深衷別後能
相思何嗟山水重

送張秘書充劉相公通汴河判官便

赴江外覲省

前年見君時見君正泥蟠去年見君處見君
已風搏朝趨赤墀前高視青雲端新登麒麟

閣適脫獬豸冠劉公領舟楫汴水揚波瀾萬
里江海通九州天地寬昨夜動使星今日送
征鞍老親在吳郡令弟雙同官鱸膾剩堪憶
尊羹殊可餐既參幕中畫復展膝下驩因送
故人行試歌行路難何處路最難最難在長
安長安多權貴珂珮聲珊珊儒生直如絃權
貴不須干斗酒取一醉孤琴為君彈臨岐欲
有贈持以握中蘭

冬宵家會錢李郎司兵赴同州

急管雜青絲玉瓶金屈卮寒天高堂夜撲地
飛雪時賀君關西掾新綬腰下垂白面皇家
郎逸翮青雲姿明旦之官去他辰良會稀惜
別冬夜短務歡杯行遲季女猶自小老夫未
令歸且看匹馬行不得鳴鳳飛昔歲到馮翊
人煙接京師曾上月樓頭遙見西嶽祠沙苑
逼官舍蓮峯壓城池多暇或自公讀書復彈
棊州縣信徒勞雲霄亦可期應須力為政聊
慰此相思

送顏平原并序

十二年春有詔補尚書十數公為郡守上親
賦詩觴群公宴于蓬萊前殿仍錫以繒帛寵
餞加等參美顏公是行為寵別章句
天子念黎庶詔書換諸侯仙郎授剖符華省
輟分憂置酒會前殿賜錢若山丘天章降三
光聖澤該九州吾兄鎮河朔拜命宣皇猷駟
馬辭國門一星東北流夏雲照銀印暑雨隨
行翰赤筆仍在篋鑪香惹衣裘此地鄰東溟

孤城弔滄洲海風掣金戟導吏呼鳴騶郊原
北連燕剽劫風未休魚鹽隘里巷桑柘盈田
疇為郡豈淹旬政成應未秋易俗去猛虎化
人似馴鷗蒼生已望君黃霸寧久留

送狄員外巡按西山軍得霽字

兵馬守西山中國非得計不知何代策空使
蜀人弊八州崖谷深千里雲雪閉泉澆閣道
滑水凍繩橋脆戰士常若飢糗糧不相繼胡
兵猶不歸空山積年歲儒生識損益言事皆

審諦狄子幕府卽有謀必康濟
宵中懸明鏡照耀無巨細
莫辭冒險艱可以裨節制
相思江樓夕愁見月澄霽

號州送鄭興宗弟歸扶風別廬

佐郡已三載豈能長後時
出關少親友賴汝常相隨
今日忽言別愴然俱淚垂
半生滄洲意獨有青山知
州縣不敢說雲霄誰敢期
因懷東溪老最憶南峯緇
我爲多種藥還山應未遲

澧頭送蔣侯

君住澧水比我家澧水西
兩村辨喬木五里聞鳴雞
飲酒溪雨過彈棊山月低
徒開蔣生徑爾去誰相攜

送永壽王贊府遙歸縣

當官接閑暇暫得歸林泉
百里路不宿兩鄉山復連
夜深露濕簟月出風驚蟬
且盡主人酒爲君從醉眠

潼關鎮國軍句覆使院早春寄王同

州

胡寇尚未盡大軍鎮關門旌旗遍草木兵馬
如雲屯聖朝正用武諸將皆承恩不見征戰
功但聞歌吹喧儒生有長策閉口不敢言昨
從關東來思與故人論何為廊廟器至今居
外藩黃霸寧淹留蒼生望騰蹇卷簾見西岳
仙掌明朝暎昨夜聞春風戴勝過後園各自
限官守何由叙涼溫離憂不可忘襟背思樹
萱

青山峽口泊舟懷狄侍御

峽口秋水壯沙邊且停橈奔濤振石壓峯勢
如動搖九月蘆花新彌令客心焦誰念在江
島故人滿天朝無處豁心胃憂來醉能銷往
來巴山道三見秋草彫狄生新相知才調凌
雲霄賦詩折造化入幕生風颺把筆判甲兵
戰士不敢驕皆云梁公後遇鼎還能調離別
修經時音塵殊寂寥何當是夫子不歎鄉關
遙

寄青城龍溪真道人

五嶽之丈人西望青曹曹雲開露崖嶠百里
見石稜龍溪盤中峯上有蓮華僧絕頂小蘭
若四時嵐氣凝身同雲虛無心與谿清澄誦
戒龍每聽賦詩人則稱杉風吹袈裟石壁懸
孤燈久欲謝微祿誓將歸大乘願聞開士說
庶以心相應

梁州對雨懷麴二秀才便呈麴大判
官時疾贈余新詩

江上雲氣黑岬山昨夜雷水惡平明飛雨從
嶠冢來濛濛隨風過蕭颯鳴庭槐隔簾濕衣
巾當暑涼幽齋麴生住相近言語阻且乖卧
疾不見人午時門始開終日看本草藥苗滿
前堦兄弟早有名甲科皆秀才二人事慈母
不弱古老萊昨歎攜手遲未盡平生懷愛君
有佳句一日吟幾回

潼關使院懷王七季友

王生今才入時輩咸所仰何當見顏色終日

勞夢想驅車到關下欲往阻河廣滿目徒春
華思君罷心賞開門見太華朝日映高掌忽
覺蓮花峯別來更如長無心顧微祿有意在
獨往不負林中期終當出塵網

至大梁却寄匡城主

一從棄魚釣十載干明主無由謁天階却欲
歸滄浪仲秋至東郡遂見天雨霜昨夜夢故
山蕙草色已黃平明辭鐵丘薄暮遊大梁仲
秋蕭條景拔刺飛鵝鷓四郊陰氣閉萬里無
晶光長風吹白茅野火燒枯桑故人南燕吏
籍籍名更香聊以玉壺贈置之君子堂

宿華陰東郭客舍憶閭防

次舍山郭近解鞍鳴鐘時主人炊新粒行子
充夜飢關月生首陽照見華陰祠茫茫秋山
晦蕭瑟寒松悲爰從園廬別遂與朋知辭舊
壑蘭社晚歸軒今已遲

春遇南使貽趙知音

端居春心醉襟背思樹萱美人在南州為爾

歌北門北風吹煙物戴勝鳴中園枯楊長新
條芳草滋舊根網絲結寶琴塵埃被空樽適
遇江海信聊與南客論

郊行寄杜位

嶮崿空城煙淒清寒山景秋風引歸夢昨夜
到汝穎近寺聞鐘聲映陂見樹影所思何由
見東北徒引領

懷葉縣關操姚曠韓涉李叔齊

數子皆故人一時吏宛葉經年揔不見書札

徒滿篋斜日半空庭旋風走梨葉去君千里
地言笑何時接

初至西虢官舍南池呈左右省及南
宮諸故人

黜官自西掖待罪臨下陽空積犬馬戀豈思
鴛鷺行素多江湖意偶佐山水鄉滿院池月
靜卷簾溪雨涼軒窓竹翠濕案牘荷花香白
鳥上衣桁青苔生筆牀數公不可見一別盡
相忘敢恨青瑣客無情華省郎早年迷進退

曉節悟行藏他日能相訪嵩南舊草堂

宿東谿懷王屋李隱者

山店不鑿井百家同一泉晚來南村黑雨色
和人煙霜畦吐寒菜沙鴈噪河田隱者不可
見天壇飛鳥邊

聞崔十二侍御灌口夜宿報恩寺

聞君尋野寺便宿支公房溪月冷深殿江雲
擁回廊燃燈松林靜煮茗柴門香勝事不可
接相思幽興長

林卧

偶得魚鳥趣復茲水木涼遠峯帶雨色落日
搖川光曰中西山藥袖裏淮南方唯愛隱几
時獨遊無何鄉

岑嘉州集卷第二

五言古詩

敬酬杜華淇上見贈兼呈熊曜

杜侯實才子盛名不可及
祇曾効一官今已年四十
是君同時者已有尚書郎
憐君獨未遇淹泊在他鄉
我從京師來到此喜相見
共論窮途事不覺淚滿面
憶昨癸未歲吾兄自江東
得君江湖詩骨氣凌謝公
熊生尉淇上開館常待客
喜我二人來歡笑朝復夕
縣樓



壓春岸戴勝鳴花枝吾徒在舟中縱酒兼彈
棊三月猶未還客愁滿春草賴蒙瑤華贈諷
詠慰懷抱

酬成少尹駱谷行見呈

聞君行路難惆悵臨長衢豈不憚險艱王程
剩相拘億昨蓬萊宮新授刺史符明主仍賜
衣價直千萬餘何幸承命日得與夫子俱攜
手出華省連鑣赴長途五馬當路嘶按節按
蜀都千崖信縈折一徑何盤紆層冰滑征輪

密竹礙隼旗深林迷昏旦棧道凌空虛飛雪
縮馬毛烈風擘我膚峯攢望天小亭午見日
初夜宿月近人朝行雲滿車泉澆石罅圻火
入松心枯亞尹同心者風流賢大夫榮祿上
及親之官隨板輿高價振臺閣清詞出應徐
成都春酒香且用俸錢沽浮名何足道海上
堪乘桴

號中酬陝西甄判官贈

微才棄散地拙宦慙清時白髮徒自負青雲

難可期胡塵暗東洛亞相方出師分陝振鼓
鞏二嶠滿旌旗夫子廊廟器迥然青冥姿闔
外佐戎律幕中吐兵竒前者驛使來忽枉行
軍詩晝吟庭花落夜諷山月移昔君隱蘇門
浪跡不可羈詔書自徵用令譽天下知別來
春草長東望轉相思寂寞山城暮空聞畫角
悲

過梁州奉贈張尚書大夫公

漢中二良將今昔各一時韓信此登壇尚書

復來斯手把銅虎符身總丈人師錯落北斗
星照耀黑水湄英雄若神授大材濟時危頃
歲遇雷雲精神感靈祗勲業振青史恩德繼
鴻私羗虜昔未平華陽積僵屍人煙絕墟落
鬼火依城池巴漢空水流衰斜惟鳥飛自公
布德政此地生光輝百堵創里閭千家恤惇
嫠層城重鼓角甲士此熊羆坐嘯風自調行
春雨仍隨芄芄麥苗長藹藹桑葉肥浮客相
與來群盜不敢窺何幸承嘉惠小年即相知

富貴情易踈相逢心不移置酒宴高館嬌歌
雜青絲錦席繡拂廬玉盤金屈卮春景透高
戟江雲篲長麾櫪馬嘶柳陰美人映花枝門
傳大夫印世擁上將旗承家令名揚許國苦
節施戎幕寧久駐台階不應遲別有彈冠士
希召無見遺

冀州客舍酒酣貽王綺寄題南樓

夫子傲常調詔書下徵求知君欲謁帝扶馬
趨西周逸足何駸駸美聲實風流學富贍清

詞下筆不能休君家一何盛赤奕難爲儔伯
父四五人同時爲諸侯憶昨始相值值君客
貝丘相看復乘興攜手到冀州前日在南縣
與君上北樓野曠不見山白日落草頭客舍
梨花繁深花隱鳴鳩南隣新酒熟有女彈箏
篴醉後或狂歌酒醒滿離憂主人不相識此
地難淹留吾廬終南下堪與王孫遊何當肯
相尋澧上一孤舟

北庭西郊候封大夫受降回軍獻上

胡地首着美輪臺征馬肥大夫討匈奴前月
西出師甲兵未得戰降虜來如歸橐駝何連
連穹帳亦纍纍陰山烽火滅劔水羽書稀却
笑霍嫖姚區區徒爾為西郊候中軍平沙懸
落暉驛馬從西來雙節夾路馳喜鵲捧金印
蛟龍盤畫旗如公未四十富貴能及時直上
排青雲傍看疾若飛前年斬樓蘭去歲平月
支天子日殊寵朝廷方見推何幸一書生忽
蒙國士知側身佐戎幕歛衽事邊陲自逐定

遠侯亦着短後衣近來能走馬不弱并州兒

使交河郡

奉使按胡俗平明發輪臺暮投交河城火山
赤崔嵬九月尚流汗炎風吹沙埃何事陰陽
工不遣雨雪來吾君方憂邊分闡資大才昨
者新破胡安西兵馬回鐵關控天崖萬里何
遼哉煙塵不敢飛白草空皚皚軍中日無事
醉舞傾金壘漢代李將軍微功今可哈

秋夜宿仙游寺南涼堂呈謙道人

太一連太白兩山知幾重路盤石門窄匹馬
行才通日西到山寺林下逢支公昨夜山北
時星星聞此鍾秦女去已久仙臺在中峯簫
聲不可聞此地留遺蹤石潭積黛色每歲投
金龍亂流爭迅湍噴薄如雷風夜來聞清磬
月出蒼山空空山滿清光水樹相玲瓏回廊
映密竹秋殿隱深松燈影落前溪夜宿水聲
中愛茲林巒好結宇向溪東相識唯山僧鄰
家一釣翁林晚栗初折枝寒梨已紅物幽興

易愜事勝趣彌濃願謝區中緣永依金人宮
寄報乘輦客簪裾爾何容

上嘉州青衣山中峯題惠淨上人幽
居寄兵部楊郎中

并序

青衣之山在大江之中屹然迥絕崖壁蒼峭
周廣七里長波四匝有惠淨上人廬于其巔
唯繩牀竹杖而已恒持蓮華經十年不下山
予自公浮舟聊一登眺友人夏官弘農楊侯
清談之士也素工爲文獨立于世與余有方

外之約每多獨往之意今者幽躅勝槩歎不
得與此公俱爰命小吏刮磨石壁以識其事
乃詩之達楊友爾

青衣誰開鑿獨在水中央浮舟一躋攀側逕
沿穹蒼絕頂訪老僧豁然登上方諸嶺一何
小三江奔茫茫蘭若向西開峨眉正相當猿
鳥樂鍾磬松蘿泛天香江雲入袈裟山月吐
繩牀早知清淨理久巧機心忘尚以名宦拘
聿來夷獠鄉吾友不可見鬱爲尚書郎早歲

愛丹經留心向青囊渺渺雲智遠幽幽海懷
長勝賞欲與俱引領遙相望爲政愧無術分
憂幸時康君子滿天朝老夫憶滄浪況值廬
山遠抽簪歸法王

自潘陵尖還少室居止秋夕憑眺

草堂近少室夜靜聞風松月出潘陵尖照見
十六峯九月山葉赤溪雲淡秋容火點伊陽
村煙深嵩角鐘尚子不可見將生難再逢勝
愜只自知佳趣爲誰濃昨詣山僧其上到天

壇東向下望雷雨雲間見回龍夕與人群踈
轉愛丘壑中心淡水木會興幽魚鳥通稀微
了自釋出處乃不同况本無宦情誓將依道
風

陪狄員外早秋登府西樓因呈院中

諸公

常愛張儀樓西山正相當千峯帶積雪百里
臨城墻煙氛掃晴空草樹映朝光車馬隘百
井里開盤二江亞相自登壇時危安此方威

聲振蠻貊惠化鍾華陽旌節羅廣庭戈鋌凜
秋霜階下貔虎士幕中鴛鴦行今我忽登臨
顧思不忘鄉知己猶未報鬢毛颯已蒼時命
難自知功業豈暫忘蟬鳴秋城夕鳥去江天
長兵馬休戰爭風塵尚蒼茫誰當共携手賴
有冬官郎

登嘉州凌雲寺作

寺出飛鳥外青峯戴朱樓搏壁躋半空喜得
登上頭始知宇宙闊下看三江流天晴見峨

眉如向波上浮迥曠煙景豁陰森棕栴稠願
割區中緣未從塵外遊回風吹虎穴片雨當
龍湫僧房雲濛濛夏月寒颼颼回合俯近郭
寥落見遠舟勝槩無端倪天官可淹留一官
詎足道欲去令人愁

與高適薛據同登慈恩寺

塔勢如湧出孤高聳天宮登臨出世界磴道
盤虛空突兀壓神州崢嶸如鬼工四角礙白
日七層摩蒼穹下窺指高鳥俯聽聞驚風連

山若波濤奔湊似朝東青槐夾馳道宮館何
玲瓏秋色從西來蒼然滿關中五陵北原上
萬古青濛濛淨理了可悟勝因夙所宗誓將
掛冠去覺道資無窮

登北庭北樓呈幕中諸公

嘗讀西域傳漢家得輪臺古塞千年空陰山
獨崔嵬二庭近西海六月秋風來日暮上北
樓殺氣凝不開大荒無鳥飛但見白龍塢舊
國眇天末歸心日悠哉上將新破胡西郊絕

煙埃邊城寂無事撫劍空徘徊幸得趨幕中
託身厠群才早知安邊計未盡平生懷

登千福寺楚金禪師法華院多寶塔
多寶滅已久蓮華付吾師寶塔凌太空忽如
湧出時數年功不成一志堅自持明主親夢
見世人今始知千家獻黃金萬匠磨琉璃既
空泰山木亦罄天府貨焚香如雲屯幡蓋珊
珊垂悉宰神統護衆魔不敢窺作禮覩靈境
焚香方證凝庶割區中緣脫身恒在茲

出關經華嶽寺訪法華雲公

野寺聊解鞍偶見法華僧開門對西嶽石壁
青稜層竹逕厚蒼苔松門盤紫藤長廊列古
畫高殿懸孤燈五月山雨熱三峯火雲蒸側
聞樵人言深谷猶積冰久願尋此山至今嗟
未能謫官忽東走王程苦相仍欲去戀雙樹
何由窮一乘月輪吐山郭夜色空清澄

宿太白東溪李老舍寄弟姪

渭上秋雨過北風何騷騷天晴諸山出太白

峯最高主人東溪老兩耳生長毫遠近知百
歲子孫皆二毛中庭井欄上一架獼猴桃石
泉飯香粳酒甕開新糟愛茲田中趣始悟世
上勞我行有勝事書此寄爾曹

潭石淙望秦嶺微雨作貽友人

昨夜雲際宿旦從西峯回不見林中僧微雨
潭上來諸峯皆青翠秦嶺獨不開石鼓有時
鳴秦王安在哉東南雲開處突兀獼猴臺崖
口懸瀑流半空白皚皚噴壁四時雨傍村終
日雷北瞻長安道日夕多塵埃若訪張仲蔚
衡門滿蒿萊

南池夜宿思王屋青蘿舊齋

池上卧煩暑不櫛復不巾有時清風來自謂
羲皇人天晴雲歸盡雨洗月色新公事常不
閑道書日生塵早年家王屋五別青蘿春安
得還舊山東溪垂釣綸

題華嚴寺瓌公禪房

寺南幾十峯峰翠晴可掬朝從老僧飯昨日

崖口宿錫杖倚枯松繩牀映深竹東溪草堂
路來徃行自熟生事在雲山誰能復羈束

峨眉東脚臨江聽猿懷二室舊廬

峨眉煙翠新昨夜秋雨洗分明峰頭樹倒插
秋江底久別二室間圖他五斗米哀猿不可
聽北客欲流涕

春半與群公同遊元處士別業

郭南處士宅門外羅群峰勝槩忽相引春華
今正濃山厨竹裏爨野碓藤間春對酒雲數

片卷簾花萬重巖泉嗟到晚州縣欲歸慵草
色帶朝雨灘聲兼夜鍾愛茲清俗慮何事老
塵容况有林下約轉懷方外蹤

陪群公龍岡寺泛舟

漢水天一色寺樓波底看鐘鳴長空夕月出
孤舟寒映酒見山火隔簾聞夜灘紫鱗掣芳
餌紅燭燃金盤良友興正愜勝遊情未闌此
中堪倒載須盡主人歡

終南雙峰草堂

歛跡歸山田息心謝時輩晝還草堂卧但見
雙峯對興來資佳遊事愜符勝槩著書高窓
下日夕見城內曩爲世人誤遂負平生愛久
與林壑辭及來杉松大偶茲精廬近數預名
僧會有時逐樵漁盡日不冠帶崖口上新月
石門破蒼靄色向群木深光搖一潭碎緬懷
鄭生谷頗憶嚴子瀨勝事猶可追斯人邈千
載

東歸留題太常徐卿草堂

不謝古名將吾知徐太常年纔三十餘勇冠
西南方頃曾策匹馬獨出持兩槍虜騎無數
來見君不敢當漢將小衛霍蜀將凌關張卿
月益清澄將星轉光芒復居少城北遙對岷
山陽車馬日盈門賓客常滿堂曲池蔭高樹
小徑穿叢篁江鳥飛入簾山雲來到牀題詩
芭蕉滑對酒棕花香諸將射獵時君在翰墨
場聖主賞勲業邊城最輝光與我情綢繆相
知久芬芳忽作萬里別東歸三峽長

過王判官西津所居

勝迹不在遠愛君池館幽素懷巖中諾宛得
塵外遊何必到清溪忽來見滄洲潛移岷山
石暗引巴江流樹密晝先夜竹深夏已秋沙
鳥上筆牀谿花簪簾鈎夫子賤簪冕注心向
林丘落日出公堂垂綸乘釣舟賦詩憶楚老
載酒隨江鷗翛然一傲吏獨在西津頭

因假歸白閣西草堂

雷聲傍太白雨在八九峯東望白閣雲半入

紫閣松勝槩紛滿目衡門趣彌濃幸有數畝
田得延二仲蹤早聞達士語偶與心相通悞
徇一微官還山愧塵容釣竿不復把野碓無
人春惆悵飛鳥盡南溪聞夜鍾

太一石鰲崖口潭舊廬招王學士

驟雨鳴浙瀝颼颼溪谷寒碧潭千餘尺下見
蛟龍蟠石門吞衆流絕岸呀層巖幽趣倏萬
變竒觀非一端偶逐干祿徒十年皆小官抱
板尋舊圃弊廬臨迅湍君子滿清朝小人思

掛冠釀酒漉松子引泉通竹竿何必濯滄浪
不能釣嚴灘此地可遺老勸君來考槃

岑嘉州集卷第二

岑嘉州集卷第三

五言古詩

左僕射相國冀公東齋幽居

丞相百僚長兩朝居此官成功雲雷際翊聖
天地安不矜南宮貴祇向東山看宅占鳳城
勝窓中雲嶺寬午時松軒夕六月藤齋寒玉
珮胷女蘿金印耀牡丹山蟬上衣桁野鼠緣
藥盤有時披道書竟日不着冠幸得趨省闈
常欣在門闌何當復持衡短翮期風搏

過緱山王處士黑石谷隱居

舊居緱山下偏識緱山雲處士久不還見雲
知見君別來逾十秋兵馬日紛紛青溪開戰
場黑谷屯行軍遂令巢由輩遠逐麋鹿群獨
有南澗水潺湲如昔聞

緱山西峰草堂作

結廬對中嶽青翠常在門遂耽水木興盡作
漁樵言頃來闕章句但欲閑心魂日色隱空
谷蟬聲喧暮村曩聞道士語偶見清淨源隱

几閱吹葉乘秋眺歸根獨遊念求仲開徑招
王孫片雨下南澗孤峯出東原棲遲慮益澹
脫略道彌敦野靄晴拂枕客帆遙入軒尚平
今何在此意誰與論佇立雲去盡蒼蒼月開
園

觀楚國寺璋上人寫一切經院南有

曲池深竹

璋公不出院群木閑深居誓寫一切經欲向
萬卷餘揮毫散林鵲研墨警池魚音翻四句

偈字譚五天
書鳴鐘竹陰
晚汲水桐花
初雨氣潤衣
鉢香煙泛庭
除此地日清
淨諸天應
來如不知將
錫杖早晚躡
空虛

尋鞏縣南李處士別業

先生近南郭
茅屋臨東川
桑葉隱村戶
蘆花映釣船
有時著書暇
盡日窓中眠
且喜間井
近灌田同一
泉

驪姬墓

驪姬北原上
閉骨已千秋
澮水日東注
惡名

終不流獻公
恣耽惑視子
如仇讎此事
成蔓草我來
逢古丘娥眉
山月落蟬鬢
野雲愁欲
弔二公子橫
汾無輕舟

東歸晚次潼關懷古

暮春別鄉樹
晚景低津樓
伯夷在首陽
欲往無輕舟
遂登關城望
下見洪河流
自從巨靈開
流血千萬秋
行行潘生賦
赤赤曹公謀
川上多往事
淒涼滿空洲

楚夕旅泊古興

獨鶴唳江月孤帆凌楚雲
秋風冷蕭瑟蘆荻花紛紜
忽思湘川老欲訪雲中君
麒麟息悲鳴愁見豺虎群

先主武侯廟

先主與武侯相逢雲雷際
感通君臣分義激魚水契
遺廟空蕭然英靈實千歲

文公講臺

文公不可見空使蜀人傳
講席何時散高臺豈復全
豐碑文字滅冥冥不知年

楊雄草玄臺

吾悲子雲居寂寞人已去
娟娟西江月猶照草玄處
精恠熹無人睢盱歲老樹

司馬相如琴臺

相如琴臺古人去臺亦空
臺上寒蕭條至今多悲風
荒臺漢時月色與舊時同

嚴君平卜肆

君平曾賣卜卜肆無已久
至今杖頭錢時時地上有
不知支機石還在人間否

張儀樓

傳是秦時樓巍巍至今在樓南兩江水千古
長不改曾聞昔時人歲月不相待

昇遷橋

長橋題柱去猶是未達時及乘駟馬車却從
橋上歸名共東流水滔滔無盡期

萬里橋

成都與維陽相去萬里地滄江東流疾帆去
如鳥翅楚客過此橋東看盡垂淚

石犀

江水初蕩瀟蜀人幾為魚向無爾石犀安得
有邑居始知李太守伯禹亦不如

龍女祠

龍女何處來來時乘風雨祠堂青林下宛宛
如相語蜀人競祈恩捧酒仍擊鼓

南池宴餞辛子賦得科斗子

臨池見科斗羨爾樂有餘不憂網與釣幸得
免為魚且願充文字登君尺素書

初過隴山途中呈宇文判官

一驛過一驛驛騎如星流
平明發咸陽暮到隴山頭
隴水不可聽嗚咽令人愁
沙塵撲馬汗霧露凝貂裘
西來誰家子自道新封侯
前月發安西路上無停留
都護猶未到來時在西州
十日過沙磧終朝風不休
馬走碎石中四蹄皆血流
萬里奉主事一身無所求
也知塞垣苦豈爲妻子謀
山口月欲出先照關城樓
谿流與松風靜夜相颼颼
別來賴歸夢山

塞多離憂與子且攜手不愁前路脩

東歸發捷爲至泥溪舟中作

前日解侯印泛舟歸山東
平旦發捷爲逍遙信回風
七月江水大滄波漲秋空
復有峨眉僧誦經在舟中
夜泊防虎豹朝行逼魚龍
一道鳴迅湍兩邊走連峯
猿拂岸花落鳥啼巖樹重
煙靄吳楚連泝沿湖海通
憶昨在西掖復曾入南宮
日出朝聖人端笏陪群公
不意今棄置何由豁心胷
吾當海上去且學乘桴

翁

與鮮于庶子自梓州成都少尹自褒
城同行至利州道中作

剖竹向西蜀岷峨眇天涯空深北闕戀豈憚
南路賒前日登七盤曠然見三巴漢水出嶠
冢梁山控裊斜棧道籠迅湍行人貫層崔巖
傾劣通馬石窄難容車深林怯魑魅洞穴防
龍蛇水種新插被山田正燒畬夜猿嘯山雨
曙鳥鳴江花過午方始飯經時旋及瓜數公

各遊宦千里皆辭家言笑忘羈旅還如在京
華

下外江舟中懷終南舊居

杉冷曉猿悲楚客心欲絕孤舟巴山雨萬里
陽臺月水宿已淹時蘆花白如雪顏容老難
頰把鏡悲鬢髮早年好金丹方士傳口訣弊
廬終南下久與真侶別道書誰更開藥竈煙
遂滅頃來厭塵網安得有仙骨巖壑歸去來
公卿是何物

安西館中思長安

家在日出處朝來起東風風從帝鄉來不與
家信通絕域地欲盡孤城天外窮彌年但走
馬終日隨飄蓬寂寞不得意辛勤方在公胡
塵淨古塞兵氣宅邊空鄉路眇天外歸期如
夢中遙憑長房術為縮天山東

暮秋山行

疲馬卧長坂夕陽下通津山風吹空林颯颯
如有人蒼旻霽涼雨石路無飛塵千念集暮

節萬籟悲蕭辰鷓鴣昨夜鳴蕙草色已陳況
在遠行客自然多苦辛

赴捷為經龍閣道

側徑搏青壁危梁透滄波汗流出鳥道膽碎
窺龍渦驟雨暗溪谷歸雲網松蘿屢聞羗兒
笛厭聽巴童歌江路險復永夢魂愁更多聖
朝幸典郡不敢嫌岷峨

江上阻風雨

江上風欲來泊舟未能發氣昏雨未過突兀

山復出積浪成高丘盤滯爲嵌窟雲低岸花
掩水漲灘草沒老樹虵蛻皮崩崖龍退骨平
生抱忠信艱險殊可忽

經火山

火山今始見突兀蒲昌東赤焰燒虜雲炎氛
蒸塞空不知陰陽炭何獨燃此中我來嚴冬
時山下多炎風人馬盡汗流孰知造化功

題鐵門關樓

鐵關天西涯極目少行客關門一小吏終日

對石壁橋跨千仞危路盤兩崖窄試登西樓
望一望頭欲白

早上五盤嶺

平旦驅駟馬曠然出五盤江回兩崖闔日隱
群峰攢蒼翠煙景曙森沉雲樹寒松踈露孤
驛花密藏回灘棧道溪雨滑畬田原草乾此
行爲知己不覺蜀道難

入劔門作寄杜揚二郎中時二公並
爲杜元師判官

不知造化初此山誰開折雙崖倚天立萬仞
從地劈雲飛不到頂鳥去難過壁速駕畏巖
傾單行愁路窄平明地仍黑停午日暫赤凜
凜三伏寒巉巖五丁迹與時忽開閉作固或
順逆磅礴跨岷峨魏螭限蠻貊星背當參分
地處四南僻斗覺煙景殊杳將華夏隔劉氏
昔顛覆公孫曾敗績始知德不修恃此險何
益相公總師旅遠近罷金革杜母來何遲蜀
人慙更惜暫回丹青慮少用開濟策二友華

省卽俱爲幕中客良籌佐戎律精理皆碩畫
高文出詩騷奧學窮討贖聖朝無外戶寰宇
被德澤四海今一家徒然劔門石

阻戎瀘間群盜

南州林莽深亡命聚其間殺人無昏曉屍積
填江灣餓虎銜髑髏飢鳥啄心肝腥裊灘草
死血流水江殷夜雨風蕭蕭鬼哭連楚山三
江行人絕萬里無征船唯有白鳥飛空見秋
月圓罷官自南蜀假道來茲川瞻望陽臺雲

惆悵不敢前帝鄉北近日瀘口南連蠻何當
遇長房縮地到京關願得隨琴高騎魚向雲
煙明主每憂人節使恒在邊兵華方禦寇爾
惡胡不悛吾竊悲爾徒此生安得全

西蜀旅舍春歎寄朝中故人呈狄評

事

春與人相乖柳青頭轉白生平未得意覽鏡
心自惜四海猶未安一身無所適自從兵戈
動遂覺天地窄功業悲後時光陰歎虛擲却

爲文章累幸有開濟策何負當途人心無矜
窘厄回瞻後來者皆欲肆輔轡起草思南宮
寄言憶西掖時危任舒卷身退知損益窮巷
草轉深閑門日將夕橋西暮雨黑籬外春江
碧昨者初識君相看俱是客聲華同道術世
業通往昔早須歸天階不得安孔席吾先稅
歸鞅舊國如咫尺

行軍二首

吾竊悲此生四十幸未老一朝逢世亂終日

不自保胡兵奪長安宮殿生野草傷心五陵
樹不見二京道我皇在行軍兵馬日浩浩胡
雛尚未滅諸將懇征討昨聞咸陽敗殺戮淨
如掃積屍若丘山流血漲濃鎬干戈礙鄉國
豺虎滿城堡村落皆無人蕭條空桑棗儒生
有長策無處豁懷抱塊然傷時人舉首哭蒼
昊

早知逢世亂少小謾讀書悔不學彎弓向東
射狂胡偶從諫官列謬向丹墀趨未能匡吾
君虛作一丈夫撫劔傷世路哀歌泣良圖功
業今已遲覽鏡悲白鬚平生抱忠義不敢私
微軀

郡齋閑坐

負郭無良田屈身徇微祿平生好踈曠何事
沈羈束幸曾趨丹墀數得侍黃屋故人盡榮
寵誰念此幽獨州縣非宿心雲山忻滿目頃
來廢草句終日披案牘佐郡竟何成自悲徒
碌碌

鞏北秋興寄崔明允

白露披梧桐玄蟬晝夜號
秋風萬里動日暮黃雲高
君子佐休明小人事蓬蒿
所適在魚鳥馬能徇錐刀
孤舟向廣武一鳥歸成皋
勝槩日相與思君心鬱陶

衙郡守還

世事何反覆一身難可料
頭白翻折腰歸家還自笑
所嗟無產業妻子嫌不調
五斗米留人東溪憶垂釣

尹相公京兆府中棠樹降甘露詩

相國尹京兆政成人不欺
甘露降庭府上天表無私
非無他人家豈少群木枝
彼茲甘棠樹美掩召伯詩
團圓甜如蜜晶晶凝若脂
千柯玉光碎萬葉珠顆垂
崑崙何時來慶雲相逐
飛魏宮銅盤貯漢帝金掌
持王澤布人和精心動靈祗
君臣日同德禎瑞方潛施
何術令大臣感通能及茲
忽驚政化理暗與神物期
却笑趙張輦徒稱今古稀
為君下天酒麴

葉將用時

劉相公中書江山畫帳

相府徵墨妙揮毫天地窮始知丹青筆能奪
造化功瀟湘在簾間廬壑橫坐中忽疑鳳凰
池暗與江海通粉白湖土雲黛青天際峯晝
日恒見月孤帆如有風巖花不飛落澗草無
春冬擔錫香爐緇釣魚滄浪翁如何平津意
尚想塵外蹤富貴心獨輕山林興彌濃幽
趣頗異出處事不同請君為蒼生未可追赤

松

秋夕聽羅山人彈三峽流泉

皤皤岷山老抱琴鬢蒼然衫袖拂玉徽為彈
三峽泉此曲彈未半高堂如空山石林何颯
颯忽在窓戶間繞指弄嗚咽青絲激潺湲演
漾怨楚雲虛徐韻秋煙疑兼陽臺雨似雜巫
山猿幽引鬼神聽淨令耳目便楚客腸欲斷
湘妃淚班班誰裁青桐枝桓以朱絲絃能含
古人曲迺與今人傳知音難再逢惜君方老

年曲終月已落惆悵東齋眠

精衛

負劍出門北乘桴適東溟一鳥海上飛云是
帝女靈玉顏溺水死精衛空為名怨積徒有
志力微竟不成西山木石盡巨壑何時平

石上藤

石上生孤藤弱蔓依石長不逢高枝引未得
凌空上何處堪託身為君長萬丈

岑嘉州集卷第三

當湖
陳
野
堂
題

